

書名 大學衍義補一百六十卷首一卷
嘉靖三十八年福建吉澄等校刊本
撰者 明 丘濬 撰
卷 卷四十八
內容分類 子-儒家-議論經濟-明
索書號 大木-總類-政論-諸子-46
編號 C4492000

卷四十八



[彩色首頁1](#)

[東洋文化研究所漢籍目錄 編號: C4492000](#)

[東洋文化研究所漢籍目錄所藏漢籍善本全文影像資料庫 索書號: 大木-總類-政論-諸子-46](#)

[漢籍善本全文影像資料庫文本](#) [大學衍義補一百六十卷首一卷](#) [嘉靖三十八年福建吉澄等校刊本](#)

版權所有: 東京大學 東洋文化研究所
[使用上的注意事項](#)

正朝廷

大學衍義補卷第一
治國平天下之要

總論朝廷之政

臣按宋儒真德秀大學衍義格物致知之要既有所謂審治體者矣而此治國平天下之要又有正朝廷而總論朝廷之政何蓋前之所審者治平之體言其理也此所論者治平之政言其事也一主於知主於行蓋必知於前而後能行於後後



天子皮弁服升正殿文武百官朝服侍班京尹行
四拜禮禮官引京尹升殿跪于玉陛前進所塑
土牛訖復行四拜禮畢文武百官行慶賀禮是
日賜百官春宴以上進春
以上王朝之禮臣按王朝之禮非止於此
著其切要者耳其郊廟群祀則具於祭祀
藉田則具於農事養老視學則具於學校
鄉飲酒禮則具於郡國之禮大閱之禮則
具于嚴武備

大學衍義補卷第四十七

大學衍義補卷第四十八

治國平天下之要

明禮樂

郡國之禮

周禮州長

二千五百家為一州

各掌其州之教治政令之法則

正月

建子之月

之吉各屬也其州之民而讀法以攷其德

行道藝而勸之以糾其過惡而戒之若以歲時祭祀

州社則屬其民而讀法亦如之歲終則會其州之政

令正歲

建寅之月

則讀教法如初

黨正

五百家為一黨

各掌其黨之政令教治及四時之孟月

吉日則屬民而讀邦法以糾戒之春秋祭禋謂祭水旱之類

亦如之

族師百家為族各掌其族之戒令政事月吉則屬民而讀

邦法

閭胥

二十五家為閭

各掌其閭之徵令聚衆庶既比則讀法

朱熹曰周禮屬民讀法令有司能一歲三四舉行之其於風化不為無助

臣按成周盛時制為教治政令之法既已行之於朝廷國都而又推之州黨族閭焉二千五百家為州州有長五百家為黨黨有正百家為族

族有師二十五家為閭閭有胥皆以歲時屬其民而讀邦法每歲之常州長則以正月及正歲是一歲而再讀也黨正則以四時之孟月是一歲而四讀也族師則每月而一舉行焉是一歲而十二讀也他如州長之祭祀州社黨正之春秋祭禋族師之春秋祭酺其非時而讀法者又不止一也是以當時之民耳目之所聞見者莫非先王之教典朝廷之政治官府之禁令是其出作入息皆在乎禮法之中出口入耳無非勸戒之語欲為善而知所勸欲為惡而有所懲此

所以比屋可封而鄉無不善之俗而世多良材也歟我

聖祖作為教民榜文頒布天下閭里

御製大誥三編頒布天下學校蓋即周官所謂教治政令之法也

鄉師之職正歲稽其鄉器

考其比五家共平聲吉凶

三服間

二十家共祭器族

百共喪器黨

五百共射器州

二千五

共賓器鄉

萬二千

共吉凶禮樂之器

鄭玄曰吉服者祭服也凶服者弔服也比長主集

為之祭器者簠簋鼎俎之屬閭胥主集為之喪器

者素俎揭豆之屬族師主集為之此三者民所以

相共也射器者弓矢楅中之屬黨正主集為之賓

器者尊俎笙瑟之屬州長主集為之吉器若閭之

祭器也凶器若族之喪器也禮樂之器若州長賓

射之器鄉大夫集此四者為州黨族閭有故而不

共也此鄉器者旁使相共則民無廢事上下相補

則禮行而教成矣

臣按成周盛時以禮樂為治而行禮樂者必有

器具非特朝廷之上為然而凡比閭族黨之間

皆有其器以為行禮之具當世之民耳聞而目

見無非禮樂之事此所以比屋可封而成粹美之俗也後世非獨民不識禮樂而名爲士大夫者亦惟口誦其言而不知其所以爲禮樂之器具何如也風俗之不如古又何怪哉以上讀法供器禮記曰鄉飲酒之義主人拜迎賓于庠門之外入三揖而后至階三讓而后升所以致尊讓也盥洗揚觶所以致潔也拜至拜洗拜受拜送拜旣所以致敬也尊讓潔敬也者君子之所以相接也君子尊讓則不爭潔敬則不慢不慢不爭則遠於鬪辨矣不鬪辨則無暴亂之禍矣

大臨曰鄉飲酒者鄉人以時會聚飲酒之禮也因飲酒而射則謂之鄉射鄭氏謂三年大比興賢者能者鄉老及鄉大夫率其吏與其衆以禮賓之則是禮也三年乃一行諸侯之鄉大夫貢士於其君蓋亦如此黨正每歲國索鬼神而祭祀則以禮屬民而飲酒于序則黨正因蜡飲酒亦此禮

臣按先儒謂鄉飲有四一則三年賓興賢能二則鄉大夫飲國中賢者三則州長習射四則黨正蜡祭今世所行者惟存一鄉大夫飲國中賢者爾他如所謂州長習射黨正蜡祭世不復講

而三年賓興賢能其宴會雖謂爲鹿鳴而亦不以鄉飲爲名焉夫鄉飲之名始於成周漢唐以來亦間行之然無定制我

太祖皇帝得國之初卽詔天下府州縣每歲再行求爲定制伏讀

御製大誥有云鄉飲酒禮不過申明古先哲王教令而已所以鄉飲酒禮叙長幼論賢良別姦頑異罪人其坐席間年高有德者居于上高年淳篤者並之以次序齒而列其有曾違條犯法之人列於外坐同類者成席不許干於良善之

席主者若不分別致使貴賤混淆察知或坐中人發覺主者坐以違制姦頑不由其主紊亂正席全家移出化外嗚呼斯禮古先哲王之制安良民於宇內亘古至今興者鄉里安鄰里和長幼序無窮之樂大哉

王言所謂從者昌否者亡其垂世警俗之意深矣傳曰禮之教化也微其止邪於未形使民日遷善遠罪而不自知也其此意歟

故聖人制之以道鄉人故君子尊於房戶之間賓主共之也尊有玄酒以水爲之貴其質也羞出自東房主人

共之也洗當東榮主人之所以自潔而以事賓也
鄭玄曰鄉人謂鄉大夫也士謂州長黨正也君子
謂卿大夫也尊於房戶之間賓主共之者設酒尊
於東房之西室戶之東在賓主之間酒雖主人之
設而賓亦以之酢主人故云共之也地道尊右設
玄酒在西者貴其質素故也

臣按此古人行鄉飲酒禮之一賈公彥所謂又
有鄉大夫士飲國中賢者用鄉飲酒者此也由
是觀之則是禮非獨尚齒又所以尚賢也而我
聖祖之誥所謂序長幼尚齒也論賢良尚賢也然

非特如此而已又因之以別姦頑異罪人一禮
之舉衆義備焉嗚呼盛哉

周禮鄉大夫之職三年則大比故其德行道藝而興
賢者能者鄉老及鄉大夫帥其吏與其衆寡以禮禮
賓之以鄉飲之禮而賓之

吳澂曰古者鄉大夫行鄉飲酒于鄉學以賓禮興
賢者能者而升其書于天府擇其最賢者爲賓其
次爲介此以德選不以齒論

臣按此古人行鄉飲酒禮之二也

本朝三年大比一開科

兩京十三藩皆有鄉試撤棘之日有司設席以待考試官及中式舉子謂之鹿鳴宴今宜斟酌古制以解首爲賓以次爲介爲三賓爲衆賓而以考試官爲僎提調官爲主監試官爲司正執事官及藩臬官僚皆以陪位其中執事人員有營私作弊者列於外坐一如

朝廷頒降禮制而行以復古人賓興賢能之禮

或別設席以勞試官亦可

黨正國索鬼神而祭祀則以禮屬民而飲酒于序以正齒位

鄭玄曰國索鬼神而祭祀謂歲十二月大蜡之時也正齒位者鄉飲酒義所謂六十者坐五十者立侍六十者三豆七十者四豆八十者五豆九十者六豆是也必正之者爲民三時務農至此農隙而教之尊長養老見孝弟之道也

臣按此古人行鄉飲酒禮之三也竊惟

今制一歲凡再行鄉飲酒禮既行之於正月望日又以十月朔旦行焉歲首之禮宜如常制合養在官在民之老以正齒位若夫孟冬之月百穀告成農夫終歲勤苦始得少息請略倣周人

蜡祭之禮備牲醴以索祭鬼神聚民之老者飲以勞之遂禮其年高有德者以爲大賓而以其能帥子弟耕稼者爲衆賓庶合古禮意

射義曰卿大夫士之射也必先行鄉飲酒之禮

賈公彥曰州長因春秋二時以禮會聚其民而行禮於州之序學中先行鄉飲酒爲禮而射

臣按此古人行鄉飲酒禮之四是卽州長春秋以禮會民而射于州序也
臣請于正月望日十

月朔日行禮之後卽率賓介以下依

朝廷原降射禮儀注行射禮於學中庶古禮復

行於今日

孔子曰吾觀於鄉而知王道之易易也

呂大臨曰禮之所尊尊其義也其文則擯相習之其義則君子知之脩其文達其義然後可以化民成俗也貴賤明隆殺辨和樂而不流第長而無遺安燕而不亂此五者皆見於飲酒之禮而可以化民成俗故曰吾觀於鄉而知王道之易易也易謂易行易易者甚言其易也

黃幹曰請賓介陳器饌獻賓介獻僎旅酬燕此六者禮之大節也登降辭受禮之文也鼎俎籩豆禮

之器也脯醢春膏禮之用也此觀禮者所共知也其數易知其義難知也鄉飲教親睦也鄉飲親睦陵犯爭訟之風息矣一飲一食一拜一坐一揖一降無非教也通於義者又非但可以親睦鄉閭而已也天理得人心正無所施而不可也聖人著爲禮以教人凡爲鄉人者皆知此義焉此成周之世所以人人皆有士君子之行也禮廢樂墜鄉人之群飲者未嘗廢豐飲食侈供張悅聲妓恣驩嗷教侈也誨淫也恣欲也無非所以敗人心者也後世之士夫曾古之服勤於畎畝者之不若也然則是

禮也今世學士大夫有志於古者其可不思所以講明而肄習之歟

臣按孔子此言與所謂聖人制之以道及我

聖誥之文是知是禮之在天下誠行王道之要萬世帝王所當舉行而凡有民社之寄者不可徒應故事而不知所以敬慎之也

以上鄉飲酒禮

周禮鄉大夫退而以鄉射之禮五物

猶事也

詢衆庶一

曰和

發而中節

二曰容

動皆合禮

三曰主皮

不失正鵠

和五曰興舞

節比於樂

吳澂曰詢衆庶者問於衆庶而求其人也

臣按此鄉大夫賓興賢能既退而行鄉射之禮以詢衆庶也我

聖祖於洪武三年初詔天下開科第三場面試四事其一曰射以觀其中數多寡卽此制也

州長春秋以禮會民而射于州序

丘葵曰序者州之學孟子曰序者射也蓋射以序進且以別其賢否也

臣按三代之後射禮不行也久矣惟晉庾亮曾依周制以行我

聖祖初得天下卽令天下府州縣學訓誨生員每

日講讀經書罷於學後設一射圃教學生習射朔望要試過其有司官閑暇時與學官一體習射命禮部定圖式儀注凡八則一射式二樹射鵠三置射位四主射五賞酒六司射七射器八射職九射位十儀注所謂射器者凡九射職者凡七至今天下皆立射圃朔望有司躬謁先師及聽諸生講讀後詣圃行射禮是卽州長會民射于州序之遺意也

射義曰故射者進退周還必中禮內志正外體直然後持弓矢審固持弓矢審固然後可以言中此可以

觀德行矣

呂大臨曰禮射者必先比耦故一耦皆有上耦下耦皆執弓而挾矢其進也當階及階當物及物皆揖其退也亦如之其行有左右其升降有先後其射皆拾發其取矢於楅也始進揖當楅揖取矢揖既楅挾揖退與將進者揖其取矢也有橫弓卻手兼肘順羽拾取之節焉卒射而飲勝者袒決遂執張弓不勝者襲脫決拾加弛弓升飲相揖如初則進退周旋必中禮可見矣夫先王制禮豈苟爲繁文末節使人難行哉亦曰以善養人而已蓋君子

之於天下必無所不中節然後成德必力行而後有功其四肢欲安佚也苟恭敬之心不勝則怠惰傲慢之氣生動容周旋不能中乎節體雖佚而心亦爲之不安安其所不安則手足不知其所措故放辟邪侈踰分犯上將無所不至天下之亂自此始矣聖人憂之故常謹於繁文末節以養人於無所事之時使其習之而不憚煩則不遜之行亦無自而作至於久而安之則非禮不行無所往而非義矣君子敬以直內義以方外所存乎內者敬則所以形乎外者莊矣内外交脩則發乎事者中矣

射一藝也容比於禮節比於樂發而不失正鵠是必有樂於義理久於敬恭用志不分之心然後可以得之則其所以得之者其爲德可知矣

子曰君子無所爭必也射乎揖讓而升下而飲其爭也君子

朱熹曰揖讓而升者大射之禮耦進三揖而後升堂也下而飲謂射畢揖降以俟衆耦皆降勝者乃揖不勝者升取觶立飲也言君子恭遜不與人爭惟於射而後有爭然其爭也雍容揖遜乃如此則其爭也君子而非若小人之爭矣

子曰射不主皮爲力不同科古之道也

朱熹曰射不主皮鄉射禮文爲力不同科孔子解禮之意如此也皮革也布侯而棲革於其中以爲的所謂鵠也科等也古者射以觀德但主於中而不主於貫革蓋以人之力有疆弱不同等也

楊時曰中可以學而能力不可以疆而至

臣按儀禮射有三大射賓射燕射天子諸侯卿大夫皆有之士無大射而有賓射燕射後世禮廢之後而所謂射者惟用之戰陳而用之以爲禮節者蓋微矣我

聖祖欲以之取士以復古人擇士擇官之制而不
果既而頒其圖式儀注於天下非但以是而教
上子而必俾學官與有司習射焉噫方其無事
而教之於學校以習其禮遜之容一旦有事也
則以用之於戰陳而無敵於天下矣以上鄉射禮
周禮大行人王之所以撫邦國諸侯者歲徧存問其安否
三歲徧眺眡其治效五歲徧省察其風俗
國語曰周之秩官秩官周常官篇名有之曰敵國賓至關尹
官以告行李使以節為信逆迎也之侯人為道導引卿出
郊勞門尹除掃除門宗祝執祀司里授館司徒具徒

司空視塗道司寇詰姦姦盜虞人入材材木甸人積

薪薪用以爇火師監燎燎火水師監濯濯膳宰致餐熟廩人

獻餼食生司馬陳芻馬養工人展車補傷百官各以物至

賓入如歸是故小大莫不懷愛其貴國之賓至則以

班加一等益虔至于王使則皆官正長涖也事上卿

監視也之

臣按周禮一書其於諸侯聘問之禮詳備而於
王朝遣使之禮略焉大行人主之所以撫邦國
諸侯無歲無之而不聞其有節送供奉之禮獨
於國語定王使單襄公聘宋楚而道陳道弗而

後漢書卷四
三
不可行歸告於王而引周之秩官之語所言皆
侯國之禮其末一語云至於王使皆官正蒞事
上卿監之則在當時必有其禮周禮立制以訓
諸侯惟載其所以相待之禮而其所以奉上者
不載焉非不載也敵國之禮尚如此而貴國賓
至且以班加一等益虔則天子之使至所加不
止於一等而其所以虔敬者益之又益可知也
自罷侯置守之後無復邦交之禮所以奉承者
惟天子之使爾攷歷代之禮制惟有王朝之禮
所謂郡邑之禮泯如也

本朝開國之初定爲洪武禮制出使禮儀凡六
條二十年又命禮部官著爲禮儀定式出使禮
儀凡三條二十七年又命禮官參用二書爲出
使禮儀總二十條開讀遣使一奉使王國二奉
使諸司十四蕃國三頒降行人司永爲定制又
詔頒迎

詔儀注於天下凡朝遣使各處開讀將至所在
官僚朝服具龍亭絲輿儀仗鼓樂郊迎使者下
馬以 詔置于龍亭使者立亭東官吏人等北
向行五拜三叩頭禮衆官及鼓樂前導使者隨

行至所司衆官先入東西序立龍亭至使者立

其東西向

如有出使廷臣先贊曰出使官行禮引贊引出使官於露臺行五拜三叩

禮贊唱排班班齊之後四拜使者捧

詔授展

讀官跪受之開讀衆官跪聽

出使官於露臺東跪聽

宣讀

訖展讀官捧

詔授使者復置亭中衆官俯伏

興四拜山呼舞蹈又四拜禮畢衆官詣龍亭前

跪長官致辭曰

聖躬萬福使者鞠躬答曰

聖躬萬福衆官乃退易服見使者行再拜禮臣竊

以謂自古禮文之詳莫備於周禮一書而其間

所載朝覲聘問之禮雖詳而於出使一節獨闕

而我

聖祖創爲之制其詳有如此者蓋

王朝之於郡國以地言之則疆域阻遠以分言

之則名分懸絕所以達上下之情一遠近之勢

以其有使臣之往來

詔令之頒布耳其所以

迎接而授受者苟簡而粗率非獨無以嚴

九重之威命重皇華之使節而下之人亦輕忽

而不知所重而播告之脩申諭之意或不足以

聳動乎奉承之人而事體或至於隳機會或至

於失亦或有之矣

以上出使及迎詔禮

月令季冬之月命有司大難

與卿同

旁磔

披磔牲體出穰除陰氣

出

土牛以送寒氣

陳澔曰月建丑丑爲牛土能克水故特作土牛以

畢送寒氣也

陳祥道曰土勝水牛善耕勝水故可以勝寒氣善耕故可以示農耕之早晚月令季冬之月大難旁磔然後出土牛則出土牛驅除之終事也旣乃告民出五種命農計耦耕事則出土牛又農耕之始事也

後漢祭祀志立春之日迎春于東郊車旗服飾皆青歌青陽舞雲翹之舞

宋志立春前五日並造土牛耕夫犁具於大門之外是日黎明有司爲壇以祭先農官吏各具綵杖環擊牛者三所以示勸耕之意

臣按宋景祐所頒土牛經其作土牛以歲之干色爲首支色爲身納音色爲腹以立春日干色爲角耳尾支色爲脰納音色爲蹄元至元所頒經式牛色則以立春日爲法日干爲頭角耳色支爲身色納音爲蹄尾肚色

國初襲用元制正統中始用言者製土牛色復
用歲之支干納音如宋法 今制每歲立春日
內而京兆外而藩府州縣先期造土牛芒人前
一日出東郊具鼓樂迎入所司至日行鞭春禮
衆官各執綵鞭環牛者三衆共擊碎之以上迎
春禮
馬端臨曰秦漢之後禮之因革不同有古有而今無
者如大射聘禮士相見之類是也有古無而今有者
如聖節上壽上尊號拜表之類是也

臣按古今異宜禮經有可以義起之文天下之
事揆之於義而與義無悖則是禮雖自古先王

未之有制而後世之人以義起之而創爲一代
之禮不爲過也馬氏著文獻通考獨爲王朝之
禮所謂郡國之禮無有焉其言曰今禮則雖不
能無失然而議禮制度非書生可得與聞也是
以亦不復措辭焉夫書生而與聞議禮制度而
爲之措辭固不可若夫述前人之舊詳一代之
制亦何不可之有夫所謂聖節上壽及漢以來
賀歲首魏晉以來賀冬至此雖三代以前所未
有然古者列國之於王朝朝覲會同殷頌之類
歲無虛月而今世所行者此三禮而已三禮也

在朝文武百官至日具表拜賀而天下親藩邊
將藩憲府州衛所五品以上官司先期遣官奉
表稱賀至期前一日習儀於寺觀至日於所在
官廳行慶賀禮其儀注大略如朝儀但祝贊之
辭不同及正至不用傳制耳茲三禮者

今日朝儀以爲大禮是非獨以寓臣子忠愛之
誠亦以昭示華夷使人心之趨向者益以恭萬
方之尊戴者益以固是雖古無而今有禮所謂
以義起者正此類也聖人復起臣知其決不易
之矣今其禮儀具見洪武禮制但今天下進表

衙門先期進表已行十二拜山呼舞蹈禮至日
惟行五拜三叩頭禮而五品以下衙門則付全
禮臣竊以臣子奉

上之禮宜隆而不宜殺當三大朝賀之日闔郡官
吏儒生軍民人等畢至必先演習其儀而後行
禮至日其禮乃簡略如此似乎不稱請一體俱
行全禮爲宜

以上遙賀之禮

朱熹曰禮之施於朝廷者州縣士民無以與知爲也
而盡頒之則傳者苦其多習者患其博而莫能窮也
故莫若取自州縣官民所應用者參以近制別加纂

次號曰臣民禮略鋟板模印而頒行之州縣各爲三通一通於守令廳事一通於學一通於名山寺觀皆櫝藏之守視司察體如詔書而民庶所用則又使州縣自鋟之板正歲則模而揭之市井村落使通知之則可以永久矣

又曰禮書旣頒則又當使州縣擇士人之篤厚好禮者講誦其說習其頒禮州縣各爲若干人廩之於學名曰治禮每將舉事則使教焉又詔監司如提學司者察其奉行不如法者舉懲治之

臣按朱氏此言可以施行於今請令禮官將洪武年間頒降孝慈錄諸司職掌洪武禮制禮儀定式及永樂中頒降文公家禮等書逐一參考凡繫天下郡縣家鄉臣民所當行之禮

勅翰林儒臣簡節刪潤著爲一書印行天下使之遵守如朱熹所議者又於學校村社選人習學演行而命州縣正官學校教職專一管領而提督學校憲臣敕書中以此載入俾其按部提督察其勤惰以爲勸懲是誠化民成俗之要務爲治之道莫先於此伏惟

聖明留意則朱熹之議不行於昔而行於今矣天

下臣民不勝幸甚

周禮小行人若國札

病疾為札

喪曰札

而死

則令傳

以禮傳之謂之

賻補

助其之若國凶

穀不熟

荒

為荒則令賻

以利委聚

與之若國師

旅軍役工

則令犒

犒也

犒也

犒也

之若國有

福事則令慶賀之若國有禍裁則令哀弔之凡此五

物者治其事故

臣按天子之於侯國有札喪則令傳補有凶荒

則令賻委是即太宗伯以喪禮哀死亡以荒禮

哀凶札也有師役則令犒犒是即太宗伯以禮

禮哀圖敗以卹禮哀寇亂也福事則令慶賀禍

裁則令哀弔豈非太宗伯以賀慶之禮親異姓

之國以弔禮哀禍裁者乎

臣於明禮樂下著郡

國之禮前此皆郡國奉行於上之禮此則

朝廷所以施行於下之禮也成周盛王所以周卹

保愛其臣民者不以勢而以理不以分而以禮

如此視後世以牛羊草芥待其民者有間矣嗚

呼仁矣哉

及其萬民之利害為一書其禮俗政事教治刑禁之

逆順為一書其悖逆暴亂作慝猶犯令者為一書其

札喪凶荒厄貧為一書其康樂安親和平為一書凡

此物者每國辨異之以反命于王以周知天下之故
吳澂曰萬民之利害謂若禁革則其事爲民便某
事爲民害也逆順者遵王法爲順背王法爲逆也
悖逆之犯令謂人之爲惡者也札喪凶荒厄貧謂
人之不幸而遇災者也康樂和親安平謂人之爲
善而又有福慶者也以此五者詢問諸國別而書
之使王得以周知若民利興政俗美惡人少裁禍
弭福慶集則治可知也反是則不治矣

鄭鄂曰職方掌天下之圖以周知其利害其知也
以圖此則載之以書按書所以知其事也禮俗也

政事也教治也刑禁也諸侯之所行者或有逆順
從違不爲一書無以知其叛服之事悖逆也暴亂
也作慝也犯令也過惡之已著也不爲一書無以
知其罪惡之輕重猶是魯犯令矣猶不改而猶犯
令焉札喪也凶荒也厄貧也諸侯所遭之故不爲
一書無以知遠民之憂康樂謂民之安樂和親謂
僚窠之交歡安平謂其國之寧靜不爲一書無以
知侯國之治

臣按三代封建之制行而天子所以相與爲治
者侯國也罷侯置守之後則藩服州郡實視古

諸侯焉然古之侯國不過數十今之郡縣多至
千百其土宇之分割疆域之遼隔官吏之繁多
其勢未易以合其情未易以通視古爲尤難也
在成周之時設爲小行人之職巡行而辨異之
有不能徧究而悉舉故爲之書以述其事凡有
五焉蓋先王以天下爲一家中國爲一人則小
行人以此五物者巡行天下每國而辨異之各
爲一書以反命於王以周知天下之故則人君
居九重之上不下几席而一繙閱之頃天下之
大四海之廣萬民之禮俗皆在乎心目之間矣

願乞

敕兩畿十三藩巡撫大臣及方面府州各爲一
書備載郡邑禮俗政事教治刑禁當行切要之
務以備

乙夜之覽遇有急切之事按書以求其故其於
國政未必無補

以上郡國之禮臣按郡國之禮不止於此
而所載止此者祀典則具秩祭祀下學校
則具崇教化下

大學衍義補卷第四十八



